

**JU Zavod za bolesti i ovisnosti Kantona Sarajevo**, sa sjedištem u Nahorevskoj br. 173, 71000 Sarajevo, zastupano po direktoru prof. dr sci med. Rasema Okić (u daljem tekstu: Zavod) i

**JU Terapijska zajednica – Kampus Kantona Sarajevo**, sa sjedištem u ul. Iznad sela Kešelji bb, Rakovica, 71000 Sarajevo, zastupano po v.d. direktora mr. Adis Hadžić (u daljem tekstu: TZ Kampus)

zaključili su dana 22. 02. 2024. godine

## PROTOKOL O STRUČNOJ SARADNJI

### I OPŠTE ODREDBE

**JU Zavod za bolesti ovisnosti Kantona Sarajevo** (u daljem tekstu: Zavod) je zdravstveno-socijalna ustanova sa višedecenijskom tradicijom postojanja.

Rad na prevenciji, ranom otkrivanju, liječenju i rehabilitaciji ovisnika o alkoholu i drugim psihoaktivnim supstancama provodi se u kontinuitetu još od osnivanja ove ustanove 1977. godine. Sa otvaranjem Odjeljenja za narkomaniju, od septembra 2000. godine Odlukom Vlade Kantona Sarajevo, rekonstruiše se u JU Zavod za alkoholizam i druge toksikomanije KS. Djelatnost Zavoda je vezana za sva tri nivoa prevencije sa naglaskom na specijalističko-konsultativnu zdravstvenu zaštitu, sa posebnim fokusom na saradnju sa zdravstvenim ustanovama svih nivoa zdravstvene zaštite, nezdravstvenim institucijama koje imaju za to poseban interes (prosvjetno – pedagoški zavodi, visokoškolske ustanove, centri za socijalni rad, nevladine organizacije i udruženja građana i roditelja). Odlukom o preuzimanju prava i obaveza osnivača i usklađivanja organizacije poslovanja 2014. godine, JU Zavod za alkoholizam i dr. toksikomanije KS dobiva novi naziv „JU Zavod za bolesti ovisnosti Kantona Sarajevo“.

**JU Terapijsku zajednicu – Kampus Kantona Sarajevo** (u daljem tekstu: Kampus) osnovala je Skupština Kantona Sarajevo 2003. godine, a prvi korisnici su primljeni 1.7.2007. godine. Kampus je stacionarna ustanova u kojoj se obezbjeđuje socijalno-zdravstvena zaštita osoba u cilju smanjenja somatskih šteta i psihičkih posljedica usljed dugotrajne upotrebe droga, kao i:

- psihosocijalna rehabilitacija,
- socijalna reintegracija u zajednici na ovaj način rehabilitiranih ovisnika o drogama,
- okupacioni tretman (radna terapija),
- druge mjere iz domena prevencije, prevashodno tercijarne prevencije ovisnosti o drogama i unapređenja mentalnog zdravlja,
- preduzimanje posebnih mjera i programa za sprečavanje i rano otkrivanje psihotičnih stanja (stručno-metodološka pomoć),
- zdravstveno prosvjećivanje korisnika.

Kampus kao osnovni metod svog rada koristi socioterapijske, psihoterapijske, radno-rekreativne, okupacione i druge aktivnosti u kompleksnoj rehabilitaciji teških ovisnika o drogama.

Ovaj protokol proizlazi iz zaključaka donesenih na sastanku održanom 15.2.2024. god. između predstavnika Zavoda i Kampusu.

## **II SARADNJA UGOVORENIH STRANA**

### **Član 1.**

- (1) Predmet ovog protokola je stručna saradnja vezana za djelatnost kojom se Zavod i Kampus bave, a treba da se provodi u duhu uzajamnog poštovanja i tolerancije.
- (2) Strane su saglasne da međusobno usko saraduju u smislu pružanja zdravstvenih usluga ovisnicima o psihoaktivnim supstancama kao i usluga podrške programu rehabilitacije i resocijalizacije sa ciljem postizanja dugoročne apstinencije i ostvarivanja što boljeg kvaliteta života.
- (3) Stručni tim Odjeljenja za narkomaniju identificirat će pacijente koji su motivisani za odlazak u Kampus i istima omogućiti razgovor sa predstavnicima istih.
- (4) Ugovorne strane se obavezuju da će poštovati princip zaštite personalnih podataka u skladu sa Zakonom o zaštiti osoba sa duševnim smetnjama i Zakonom o zaštiti ličnih podataka.
- (5) Kampus i Zavod se obavezuju da će odgovarati na sve pozive vezane za tretman pacijenata, a posebno u slučaju recidiva, psihičkog pogoršanja ili drugih problema.
- (6) Dogovoren je termin za održavanje sastanaka (grupa) koji će se održavati svaki prvi ponedjeljak u mjesecu od 14:00 do 15:00h.
- (7) Na grupi prisustvuje dipl. soc. radnik ispred Zavoda i dva ovlaštena predstavnika Kampusu.
- (8) Održavanje zajedničkih sastanaka je svakih šest (6) mjeseci, a po potrebi i češće. Na sastancima će se razmatrati o trenutnom zdravstvenom stanju pacijenata, odnosno korisnika.

## **III OBAVEZE ZAVODA**

### **Član 2.**

- (1) Zavod će omogućiti vrijeme i prostor za grupni rad ovlaštenih predstavnika Kampusu sa pacijentima u toku hospitalizacije jedanput mjesečno uz obavezno prisustvo dipl. soc. radnika Zavoda.
- (2) Zavod će omogućiti vrijeme i prostor za individualni rad ovlaštenih predstavnika Kampusu u toku hospitalizacije, a prema procjeni stručnog tima Zavoda.
- (3) Zavod se obavezuje da će informisati i motivisati pacijente prema procjeni stručnog tima za nastavak procesa rehabilitacije u Kampusu.
- (4) Zavod se obavezuje da će na Odsjeku za OST omogućiti ovlaštenim predstavnicima Kampusu dvaput mjesečno u dogovorenim terminima rad sa ovisnicima (dan otvorenih vrata).

## **IV OBAVEZE KAMPUSA**

### **Član 3.**

- (1) Kampus će omogućiti vrijeme i prostor za rad ovlaštenih doktora Zavoda sa korisnicima u

toku svih faza tretmana, a naročito u fazi adaptacije najmanje jedanput mjesečno. Za vrijeme liječničkog pregleda korisnika i određivanja medikamentoznih terapija, obavezno je prisustvo zdravstvenih radnika Kampusu.

(2) U skladu sa dogovorenim grupnim radom sa pacijentima Zavoda, ovlašteni predstavnici Kampusu se obavezuju da aktivno participiraju u toku posthospitalne pripreme i rehabilitacije pacijenata za dolazak u Kampus. Predstavnici Kampusu obavezuju se na pridržavanje datih tema.

(4) Kampus je dužan dostaviti imena ovlašćenih predstavnika i pri svakom dolasku istog, usmeno obavijestiti predstavnika Zavoda.

## V ZAVRŠNE ODREDBE

### Član 4.

Protokol stupa na snagu danom potpisivanja i sklapa se na neodređeno vrijeme.

### Član 5.

Sve nesuglasice će se rješavati u okviru postojeće pravne regulative i u duhu tolerancije i razumijevanja.

### Član 6.

Svaka strana može u svakom trenutku, u pisanom obliku, otkazati ovaj Protokol.

### Član 7.

Protokol je sačinjen u dva (2) istovjetna primjerka, od kojih svaka strana zadržava po jedan primjerak.

JU Terapijska zajednica  
– Kampus Kantona Sarajevo  
v.d. direktora

[Redacted signature]

JU Zavod za bolesti i ovisnosti  
Kantona Sarajevo

[Redacted signature]

prof. dr sci med. Rasema Ukić

Broj: 31-01-01-263/24

Sarajevo, 04.03.2024.

Broj: 0202-273/24

Sarajevo, 22.02.2024